



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 6 Yangia anidakangma : Tir Yimiyim tiryimiyim@aolima tir yimiyim TAPAK 8

Champhai nung tetsür 2 ket nung
Rs 1.31 crore alang heroin apu

India vs New Zealand: Shreyas Iyer
yirur masayatetsüsa kümogo



VOL. XX NO. 96 (ADOK 96) DIMAPUR RASEMNÜ (WEDNSDAY) ANEJETI (JANUARY) 18, 2023 ₹ 5.00

Tanü nungi Akhoya nung AKM tenzüker

Dimapur, Jan.17 (TYO) : Ao Kaketshir Mungdang 69 buba lokti senden January 18 nikongdang nungi Akhoya nung amungtsü asoshi tesem balala nungi lenirtem den tejaokertem adenshidagi.

Iba mungdang omen "Mapaküm Shisaluyim" ta shimteta lir. Mapaküm shisaluyim tetezü mapa küma aotsüsa kaketshisatsü angazükba lir. Iba omen nung shisalen sayurtemji Nagaland Power department nung Engineer-in-Chief Er.Moa Aier aser Engineer & Technology Entrepreneur Er.Atoba na asütsü.

Iba mungdang nung tongti tejaoker Nagaland Chief minister Wb.Neiphiu Rio alitsü.

Iba lokti mungdang ya plastic mamshiba mungdang ka asütsü meranger, anungji akok tashi packaged drinking water bottle

tila aser plastic cup mamshidaksüner ta AKM Local Planning Committee ajanga metetdaksüogo.

Ano parnokisa metetdaksüba agi, iba mungdangi tesem balala nungi arurtem metetetsü aser mapang shitak amshitsü atema tesem tesem nung arok chiyongdak "Common mess" lapoka alitsü aser Mungdang ki kima süngojemtsü angutsü, anungji mezüing sentep sentong temer shinga pei anendaki mao tanabuba sentep sentong nung adentsü.

Iba mungdang nungbo nisung meyrirjang ana shi dang adentsü saka mungdangi tsüngdong marurtema tsüngdong arua aden ama repringtsü asoshi January 18, 2023 nikongdang nungi Ao Kaketshir Mungdang Youtube channel ajanga sentong tagidak nung live stream yoktsü.

Tanü Netaji nem tetushi agütsür

Dimapur, January 17, 2023 (TYO): January 18, 2023 nü Kohima nung Netaji Subhas Chandra Bose nem tetushi agüja Iconic Events Week sentong agitsü renema lir.

Iba ya Azadi Ka Amrit Mahotsav nung shilem ka lir aser YouTube Channels ajanga live sayutsü.

Asüngnep 10:45 ako nungi Nagaland Civil Secretariat Plaza, Kohima nung National

Flags 126 sayatsü aser Nagaland Police o Assam Rifles ajanga Brass & Pipe Band Display alitsü. Iba sentong ya DIPR Nagaland ajanga sayutsü.

Maneni, nikongdang 4:15 ako nungi Netaji Subhas Chandra Bose nem tetushi agüja Capital Cultural Hall, Kohima nung sobaliba sentong ka agitsü. Iba sentong ya MyGovNagaland ajanga sayutsü.

Nagaland election atema ketdangsürtem arangshir

Dimapur, January 17, 2023 (TYO): State Assembly Election agitsü aliba atema Nagaland Chief Electoral Officer indang Office ajanga anogo ananü District Level Master Trainers (DLMTs) atema Training Program tenzüka agir.

Iba sentong ya January 17 nungi 18, 2023 tashi DC Conference Hall Kohima nung agir.

"Election Commission of India (ECI)-i Assembly Election agitsü aliba atema Nagaland semdangogo aser election maparen tenzüksü tetuyuba agütsüogo" ta Chief Electoral Officer, V. Shashank Shekhar, IAS-i Master Trainers dang ashi.

India ya Democratic linük ka lir anungji election ya kanga tongtipang lir. Master Trainers ajaki polling ketdangsürtem dang teinyaktsü shitak sayutsüla, ta paisa ashi.

"Election nung aibelen tila ka asüba ajanga maparen ajak nung kongshitsü anungji ketdangsürtemi kanga dang kümdanga inyaksangshitsüla. Pei pei district nung polling

ketdangsür nem tesayuba shitak agütsütsüla aser parnok dang district administration, police, sector officers den amalitepa inyaktsü ashitsüla" ta Nagaland CEO-isa metetdaksü.

Paisa tawa tasen akümba district tem dang teyari nungdakattem CEO indang office dang ashitsü mepishia metetdaksü.

DLMTs ya telok ana lemsar agir. Mezüngbuba telokji Pughoboto, Peren, Longleng, Kiphire, Dimapur, Zunheboto, Wokha, Phek aser Mokokchung lir aser parnok DC indang Conference Hall nung training agir.

Külen, tanabuba telokji Tseminyu, Noklak, Shamator, Chumukedima, Tuensang, Kohima aser Mon lir aser parnok DPDB Hall, (District Planning Machinery) nung training agir.

Tanep iba training lapokba sentong nung mendenji Assistant Election Officer Kohima, R. Toshimeren Aier liasü aser Joint CEO Sharon Longchari o SLMTs (State Level Master Trainers) nung aden.

Naga yimten latettsüba ya olemteper dak dang keta lir: Rio Public-i rongshiba aser MLA temi yaritepba dak alaka kecha mesütetsü

Kohima, January 17, 2023 (TYO): Naga yimten latettsüba ya olemteper dak dang keta lir aser public o MLA temi rongshitsüba dang alaka kecha inyaktsü makok, ta Nagaland Chief Minister Neiphiu Rio-i ashi.

Kohima district kübok Meriema nung Organic Farmers' Market Complex lapoktsüba sülen Rio-i osangbener den jembidang ashi.

Naga civil societies-i election magidang Naga yimten latetang ta takhangba agütsüba atema asingdangdang "nisung ajaki yimten latetnür saka iba ya public masü saka olemteper dak dang keta lir" ta Rio-i langzü.

"Public-i rongshitsüba dak alaka kecha meinyaktetsü aser

MLA 60-ia tiyongtsü nung yaritepba dak alaka kecha mesütetsü" ta pai shisem.

Civil society temi yimten melatet tashi election nung shilem magitsü ta noktakra koda? ta osangbenerisa asüngdangdang "asenoki constitutional tebilemstü ka aser law & order khuret ka marudaktsütsü, tangatetba shitak alirtemi ozüing kübok anidaktsüla" ta CM Rio-isa langzü.

NSCN-IM aser NNPGs ajanga Honibarnü parnok külemi longiemer India sorkar den Naga yimten atema jembitsü sangdongba pelashishia agizüker ta paisa ashi.

"NDPP-BJP tsüngda menden lemsaba nung onük kar lir aser

itemji January 19 nü BJP central leadership ajanga bentettsü" ta Assam Chief Minister Himanta Biswa Sarma-i ashiba atema Rio-i NDPP aser BJP tsüngda 40:20 seat sharing ji tatembang ta ashi.

BJP ya High Command Party ka lir aser tatembang telemtebaji Delhi-i agitsü saka iba dak alaka tanga kecha mali ta Nagaland CM Rio-isa ashi.

State sorkari Eastern Nagaland Peoples' Organisation (ENPO) dang election mokdangtsü lemetetba meyipa repringshitsü shiogo anungji parnok nungi telangzüba tajung ka angutsü inlar ta paisa metetdaksü.

Pa Bodbarnü Delhi-i aotsü akok.

Nagaland nung Naga nunger külem sabang ka tentettsü

Dimapur, January 17, 2023 (TYO): Mongulbarnü Kohima nung Naga kin telok 8 tashi adenshia senden ka amendang tekaratiba nung Nagaland nung Naga nunger indang külem sabang ka tentettsü bangjemtepogo.

Tanü APO Hall Kohima nung senden amendang parnoki bangzüng pezü renem. Senden nung adenertemisa tekaratiba

nung yimten latettsü atema Naga yimten telok ajak (overground & underground) külemi longjemtsü atema takhangba agütsütsü lemet.

Naga nunger atema noktaker ta asüba telok ajak kin hohotem ajanga dang tentettsü ta parnoki bangjemtep. Parnokisa Nagaland nung arogotemi January 22 (Deobar) nü Naga nunger

longjemtsü aser Naga yimten tebilemstü latettsü atema sarasademtsü mepishia metetdaksü.

Iba bangzüng nung sessional chairman Vezuhu Keyho (Chakhesang Public Organisation president) aser sessional secretary Dr. Vihuto Assumi (Sumi Hoho general secretary) nati sign asü.

Nagaland Health ketdangsürtem atema workshop agir



January 17, 2023 nü Kohima nung Commissioner & Secretary, Health & Family Welfare, Kikheto Sema, IAS den H&FW ketdangsürtem aser Project ECHO India telok külemi agiba noksa angur.

Dimapur, January 17, 2023 (TYO): Nagaland nung health ketdangsürtem atema anogo ananü 'Nagaland Immersion' ta ser workshop ka agir.

Iba sentong ya ECHO India aser NHM Nagaland ajanga January 17, 2023 nungi de Oriental Grand Kohima nung agir.

Iba sentong nung ketdangsürtem dang ECHO indang 'All Teach All Learn' model sayutsü.

"Küm ishika tejakdang ECHO India aser NHM Nagaland tsüngda MoU ka nung sign sütep. Iba ajanga TB Programme, Immunization aser Nursing Councils of Nagaland takok ngua tenzüker aser COVID 19 wara mapang virtual training agütsü" ta Mission Director, NHM Nagaland, Dr. Ritu Thurr-i ashi.

ECHO-isa COVID-19 wara mapang Nagaland kanga nungita yaria liasü aser parnoki model balala ajanga immunization aser

medical education agütsü, ta paisa ashi.

"Nagaland nung nütsüing yongsük ishika dang lir saka kodang health sector tsütsü repringdir mapa aika inyaktsüsa akümer" ta Commissioner & Secretary, Health & Family Welfare, Kikheto Sema, IAS-ia ashi.

"Iba ya ajiteta 2001 küm sorkari communalization maparen ka tenzüker. Sorkari health aser education sector indang osang sangdongtsü merang saka itemji mapa küma inyaktetsü maliasü. Anungji Project ECHO den yaritepa item maparen inyaker" ta Kikheto-i ashi.

COVID-19 wara ajanga asenoki health care tajung nungdakba ajitet. State sorkar indang alizüngji nisung ajak kasa, jenjang dalang aser health care tajung agütsütsüba lir, saka iba mapa ya sorkar kijai dangbo meinyakteter asünung nübertem

aser talisa telok balala teyari nungdaker, ta paisa metetdaksü.

Iba sentong nung Associate Vice President, ECHO India, Dr. Sandeep Bhalia-i PowerPoint ka ajanga ECHO India indang tongtipang mapatem sayua liasü.

Anogo ananü sentong nung shisalen sayurtemji Manager Training Team, Palash Tiwari, Sr. Executive Training Team, Ismail Ahmed aser Associate Manager Training Team, Sonam Parnami nung lir.

ECHO India ya 2008 küm tentet. Iba telok ya non-profit trust ka lir aser parnoki healthcare aser education wadang nung liromedem bener arutsü meranger.

ECHO India-i Nagaland nung telementoring hubs ana lapokogo aser National Health Mission (NHM), State Tuberculosis Cell (STC) Kohima o Nagaland Nursing Council den tesentaktep yangluogo.

Mimkut Mini Hornbill Festival mungdar



Kuki Inpi Nagaland-i ayongzükba Mimkut Mini Hornbill Festival January 16 nü Chumoukedima district kübok Molvom yimtsüng nung GMS ground nung tenzükogo.

Dimapur, Aenjeti/January 17 (TYO): Anogo asem amungtsü aliba 9buba State level Mimkut Mini Hornbill Festival January 16 nü Medziphema Sub Division kübok Molvom yimtsüng GMS ground nung tenzükogo.

Iba benjung ya Kuki Inpi Nagaland-i ayongzük aser Tourism Department Govt. of Nagaland-i senotsü teyari agüja "Unity Through Culture" omen nung ajemdaker mungdar.

Benjung mezümbuba anogo Retd. Commissioner & Secretary, Government of Nagaland Alun Hansing alakteta jaoker liasü. Sentong nung o jembiba mapang Mimkut benjung ayongzük amungba ya koda tongtibang iba indang lemstepba den mapa ajanga pei sobaliba sayatsüji kanga tongtibang ta ashi. Paisa, Kuki nungertem dang iba benjung ajanga yimji yimjung osang prokshitsü ajungshi.

Benjung tanabuba anogo Chief Secretary, Government of

Nagaland, J Alam, IAS alakteta jaoker liasü. Pai iba benjung nung shilem agitetba atema kanga pelaba lemsatepba liasü. Paisa, Kuki nungertem pa kanga meraketa agizükba atema pelaba lemsatepba liasü.

Sentepa aliba lokti den o jembiba mapang Chief Secretary-i, Nagaland nung aluyimba nungi tenzük sorkar tenzükba aser tanga wadang balala nungi Kuki nungertem shilem tajung agia arudar ta ashi.

Paisa, parnok kanga meranga inyakba aser state terenlok asoshi shilem tajung agiba atema parnok nem tenüngsang agütsü. Maneni pai parnok dang meranga inyaksü aser education nung temulung agütsütsü ajungshi, koba ajanga par lokti dang masü saka Nagaland renloka aoba nung teyari agütsütsü ta ashi.

J Alam-i, Kuki nunger aser benjung ayongertem dang kanga pelaba lemsatep kechiyong Mimkut Mini Hornbill amala benjung ajanga Naga nunger

sobaliba wazüka ayur aser ajungketer ta ashi.

Sentong nungsa mejeta jaoker ADC Medziphema Imsongmeren-i, Kuli nungertem dang tarutsü tajungba ka asoshi telongjem aser terenlok dak parnok rangloker aliba maneni tejakdangi bener aotsü ajungshia liasü.

Mimkut Mini Hornbill benjung tanabuba anogo, Athibung, Inbung, Molvom nungi cultural troupe balalai sobaliba tsüngsang saya aser kentenba telok The Black Cheque RFG aser kenter Maxxy Minthang, Helamboi Baite nungeri ken tena liasü.

Mimkut Mini Hornbill festival ya January 18 aonung Night carnival, extravaganza Miss Mimkut 2023 aser Kuki Custom & Culture dak sendakba nung symposium sentong ka agir tembangtsü. Iba sentong nung Director Tourism, Government of Nagaland Keduosieu Metha alakteta jaoker asütsü.

Naga United Village nung Siikriinye benjung amung

Kohima, Aenjeti/January 17 (TYO): Lürhü Krotho aser Western Chakhesang Hoho na longjemer Naga United Village, Chümoukedima nung kenten aser fashion show sentong ayonga Siikriinye benjung mungogo.

Youthnet ngutetla Hekani Jakhalu, iba sentong nung alakteta jaoker liasü.

Sentong nung o jembiba mapang Jakhalu-i, senok maitsü, sobaliba aser tetsütebou mapang nungi asenok inyaksangshitem asüngsashitsü, ajungkettsü aser benjungtsü nungdaker ya ashi.

Lanurtemi takok tajung ngunera meranga inyaksüba dak alaker tanga lenmang kecha mali, ta lai ashi.

Laisa YouthNet nung taoba küm 17 lanurtem den inyakba tajangshiba indang lemsatep aser meranga inyakerteri dang takok

anguba ajangshio, ta ashi.

Jakhalu lanurtem dang kechi mapa südir süaka idakji temaba jenjang tonga inyaktetsü atema rangloker inyaksü aser pei sempet maneni arangtetsü alitsü ajungshi, kechiyong tetoktepba tasakba küma aor ta ashi.

Maneni lai, 2011 Census nung lanur arishi küm 15 nungi 35 tsüngda alir Nagaland nütsünyongtsük shilem 40.2 mesüra lakh 8 shi lir. Taruba küm 15 tsüngda iba telok ya state loktiliba, yimden yimsüsüba aser rongsenketzüng lenirtem asütsü ta shi lai Chakhesang nunger lenirtem dang lanurtem dang lenmang tajung sayuba parnok anitetsü ajungshi.

Lanurtem lenla balala nung renloka aotsü atema Western Chakhesang Hoho den longjemer inyaksü asoshi la bendanga agütsür aliba lemsatepba, aji

asünungdang lanurtem, asen lokti tejakleni anir otettsü aser parnok Nagaland tejakdangi anir aotsü, ta ashi.

Sentong nung Western Chakhesang Hoho advisor Pusazo Luroo-i Sükrünye benjung amungba indang lemsatep.

Iba sentong ayongzük amungba nükjidongji fashion aser kenten ajanga sobaliba ajungkettsü asoshi liasü.

Iba sentong nung artist aser fashion designer temi shilem agi aser kasa mapang nung Chakhesang Women Welfare Society-i Chakhesang nunger sobusolemtsü shitak sobutsü atema shitakba sobaliba sobusolemtsütem saya liasü.

Sentong nungsa Kekhrrie Ringa, Jano Nyekha, Colored Keys amala nungtugu artist tem aser tanga artist temi shilemagia liasü.



Dr. Imkongli Memorial District Hospital (IMDH) Mokochung nung 50 bed Critical Care Unit yanglutsü atema kimung atuba noksa nung angur. Iba mozüki ya National Health Mission 'Emergency COVID Response Package-II' 2021-22 mapatong kübok yanglutsü. Iba ki asütsü atema Nagaland Health & Family Welfare Minister, S. Pangnyu Phom-i yaküm 15th Dec, 2022 nü lungzüng azüngja lir. Iba mozüki ya renemtet nungbo Mokochung nüburtem dang masü, kidanger district-tema lenmang aisü nung tajangzük angutsü imlar. Mokochung, 17th January, 2023

Angh-i Kuhlängnyi benjung salem lemsatep

Deimapur, Aenjeti/January 17 (TYO): Nagaland aser Assam Angh Prof. Jagdish Mukhi-i Tikhir nungertem den Kuhlängnyi benjung salem lemsatepogo.

Kuhläng-Nyi benjung ya teburtem atema benjung ka lir, koba kümshia January ita tasembuba hopta amunger. Iba benjung ya nokinketer benjung ka lir, kong teburtemi parnok tasü aittsü atema mulungteter. Benjung mapang parnok tsükchirtemi parnok amakba mapang parnok makoktsüsa nokdaksü

tenangzüktepba ka yanglur. Teburtem arju nung adenshia tasü aittsü aser rara nung tasü ita nokdaksü atema kati ka ajungshiteper. Parnokisa iba mapang ya tsükchirtem madak takok anguba benjungteper. Ajsüsüa tanübo iba benjung ya parnoki alima nung tetsükdaksü balala tem koktetyonga aotsü atema renemshiba benjung ka ama amunger, ta Angh-i ashi.

Benjung amungba mapang Tsüngremi nenok ajak moajang aser anema aliba den yimji yimjung nung alitsü atema imlaja atar, ta Angh-isa shisem.



MGNREGS 2020-2021 kümsük nung Mokochung district kübok item yimtsüng trok - Chakpa, Chuchuyimlang, Khensa, Longkhum, Lakhuni, New Vizo Model Village nung mapatong balala inyakba indang District Level Public Hearing on Social Audit 16th Jan, 2023 nü DRDA Conference Hall, Mokochung nung akaba mapang tangokba noksa nung angur.

Kohima DC-i tekümdangtsü metetdaksü

Dimapur, Aenjeti/January 17 (TYO): Kohima Deputy Commissioner Shanavas C-i sangdong ka ajanga, lendi nung yokyatsüartemi National Highways atsüngba ajanga gari aser nüburtem senzüsenpong nung tetsükdaksü adokogo aser iba den ano National Highway nung kija aser lokti balalai permanent aser temporary structure tem yangluba ajanga lenmang nung gari tsükokba lendong balala ajurutsüsa lendongbang nung toktsüogo

aser tarutsü nung lenmang ulushia yanglutsü atema inyakyim mesüa kümdaksüogo, ta metetdaksü.

Anungji nüburtem kümsüka toktsütsü nükjidong nung Kohima Deputy Commissioner-i January 12 nü National Highway nung ali atsünga kiojen balala yanglur aliba ya ozüng alema ta metetdaksüogo aser "Control of National Highways (Land & Traffic) Act 2002" kübok aibelenertem anema jenjang tapet agütsü ta metetdaksüogo.

Niuland DPDB senden menogo

Dimapur, Aenjeti/January 17 (TYO): Niuland District Planning & Development Board senden January 16 nü DC Conference Hall Niuland nung menogo.

renemtsü metetdaksüogo, kechiyong Niuland District nung Higher Secondary school ka dang lir.

DC aser Vice Chairman DPDB Niuland Sara S Jamir-i, 2023 küm ya district nung Proxy tesayurtem merektetba küm ka asütsü ta ashiba den officer aser lokti lenirtem dang ketdangsurtem den teka amteper inyaksü mepeshia liasü.

Senden nungsa Kuhuboto Sub-Division kübok Heveto yimtsüng agizüksü, HoD temi Chief Minister's Health Insurance Scheme (CMHIS) indang osang agütsüba aser Chief Minister's Micro Finance Initiative (CMMFI) indang onük benoka sensakasem aser agizüka liasü.

DEO Niuland-i tetsükdaksü aser tebilemtsü ajangshiba indang metetdaksüba dak sendakba nung Sara-i, DEO dang High school ya Higher Secondary school-i ajungkettsü atema benoktsü asoshi

DEO Niuland Bohovi Yeptho-i Department indang osang agütsüba mapang, department-i ajangzüktebatem aser Kuhuboto division Niuland DEO nung bendenlokba densema tebilemtsü balala aliba indang metetdakja liasü.

AOYIM NUNG ALI AYOKER:

Naga United, Dimapur anasa Aoyim nung ali tasazük 120/120 ft sen jenjang Rs.190 per sq/ft agi ayoktsü lir. (negotiable) Contact : 90896 69298.

India nung takartiba shilem 1 ket nung linük rongsen shilem 40 lir

New Delhi, January 17 (Agencies): Oxfam India-i report ajanga, linük nung takartibatem dang saru ano teimba agiba ajanga sorkar indang tongtibang schemes atema fund angutsü mesüra public sector nung mapa inyakterem nem itasen teimba agütsütetsü, ta metetdaksü.

Oxfam report ajangasa, India nung takartiba shilem 1 ket kija nung linük rongsen shilem 40 dak tema lir; tesüiba küm 10 tsüngda India nung takartibatem rongsen ano terben agi teimba kümogo aser parnok indang rongsenji 2018-19 küm India nung Union Budget (sen billion 24,422) dang nungia teimba lir, ta metetdaksü.

Oxfam report nung shia aliba agi, "Alima nung takartibatem rongnung ka-Tesla aser SpaceX tongti, Elon Musk-i 2014-18 tashi nung saru shilem 3 agütsü; Uganda linük nung tilateri shishilemba Aber Christine-i ita shia dollar sen 80 dang aazüker saka sarubo shilem 40 agütsü. Anaji medemdangra sorkartemi saru inyakyim balala benokba ajanga takartem takarba küm daksür aser sensakertembo ano tesensakba küm daksür."

Alima nung rongsenkettzüng tekeratiba ainba linüktem rongnung India densema lir, ajisüaka saru memedemba ajanga India nung rongsen tsütsü liromemedemba kanga bulua akümer.

India nung kanga takartemi ano rongsen taliba bendenlokteter, ajisüaka nisung million aika taa ishika dang ngua timtemer, ta report nung shia lir.

"Tang tensa nung timtem

aika ajurua nisung million aika aya-tzüüra agi timtemer. Climate change aser osettsüset jenjang atuba ajanga nisung million aikati nüngdakba osettsüset/ chiyungtsü maliteter. Climate change ajanga rongsenkettzüng tamajungba küm daksür, tzünglu junga marur, yipru mopung den tzümetsüng lendong ajurur, tesem balala nung jenshia alitsüsa akümer, ajisüaka industrialists aser capitalist tembo (takartem) maneni peii inyaktetba nungi tajangzük ngua jangratema alir," ta report nung shia lir.

"Coronavirus wara ajanga India tesem ajaklen tang tashi nisung million aika timtemer. Iba wara ajanga nisung million 20 dak tema süogo," ta Oxfam report ajanga metetdaksü.

India nung nungshia shilem 10 ket nung linük rongsen shilem 77 lir. 2017 küm linük nung rongsen shilem 73 bo linük nung takartiba shilem 1 ket-i ao aser India nung sensaker million 670 bo rongsen shilem 1 dang renlok, ta report nung shia lir.

Tang India nung billionaires 119 lir; 2000 küm nungbo billionaire 9 dang liasü aser 2017 küm nunga billionaire 101 dang liasü. Ajisüaka 2018-22 kümtem nung India nung anogo shia millionaire 70 adokogo.

India nunger aika senotsü agi timtemba ajanga nüngdakba health service magiteter. Küm shia healthcare jenjang tasakba akümba ajanga India nung million 63 ano kanga sensak tia-i iogo; tetezü second 2 shia nisung ana sensak tia-i air.

"India nung GST saru

agütsüba shilem asemsü nungi shilem anasübo kanga sensakertemi agütsüba lir. 2021-22 kümshik nung India nung GST saru sen 14.83 lakh crore arua liasü aser iba nungjagi saru shilem 64 bo linük nung kanga tekübokba jenjang nung aliba linük nungshia shilem 50-i agütsüba liasü, shilem 33 ji middle class pur shilem 40-i agütsüba liasü aser GST nungi sarutetba shilem 3 dang takartiba shilem 10-i agütsüba liasü," ta report ajanga metetdaksü.

Tang India nung takartiba shilem 1 kija ket nung linük rongsen shilem 40 dak tema lir aser tekübokba nungshia shilem 50 ket nung linük rongsen shilem 3 dang lir.

Coronavirus wara mapang nung Adani group chairman, Gautam Adani indang rongsen tiben agi teimba küm India nung takartiba aküm.

Item osang nung ajemdaker Oxfam-i tebilemba onük kar benokogo.

Oxfam India CEO, Amitabh Behar-i, "Kanga takartemi saru agütsüsa atema mapang tongogo. Parnoki aazükba nungi tim saru agütsüdaksütsü atema inyaktüsü," ta metetdaksü.

2017-21 nung India nunger billionaire ka kija, Gautam Adani dang nungi saru 1.79 lakh crore agi nunga küm ka atema Indian primary school tesayur million 5 nem mapa agütsütetla.

India nung billionaire takartiba nisung 10 dang nungi tang parnok ket nung aliba rongsen nungi saru shilem 5 agi nunga küm 5 tashi tribal area nung healthcare service agütsütetsü, ta report nung shia lir.

AO STUDENTS' CONFERENCE (AKM)



General Conference 2023



AKHOYA

18th - 20th JANUARY

Theme
"Education in Praxis"

Flag Hoisting Ceremony

Date : 18th January 2023
Time : 4:30 P.M

INAUGURAL SERVICE

January 18, 2023 **Time : 5:00 PM**

Inaugural Guest
Shri Tongpang Ozukum
Minister of Housing & Mechanical, Government of Nagaland

Opening Ceremony	: Akhoya Students' Union
In the Chair	: AKM Officials
Devotion	: Rev. T. Lanu Pastor, Akhoya Baptist Church
1. Introduction	: Mr. Onenpong Info. & Publicity Secy., AKM
2. Welcome Note	: Akhoya Village Council
3. Special Song	: Conference Choir
4. Exhortation	: (a) Shri. Imnatiba Advisor, Industries & Commerce, Labour & Employment, Skill Development and Entrepreneurship Government of Nagaland (b) Shri. Shashank Pratap Singh IAS Deputy Commissioner, Mokokchung
5. Special Song	: Mr. Sunep A Jamir
6. Greetings	: Mr. R. Sunep Pongen President Central Nagaland Students' Association
7. Speech from the Guest :	
8. Benediction	:









कदम कदम बढ़ाये जा

Commemorating
126th Birth Anniversary of

NETAJI SUBHAS CHANDRA BOSE

JOIN THE CELEBRATIONS PROGRAM SCHEDULE

- **HOISTING OF NATIONAL FLAG**
Chesazu Village, Phek District | Time : 7:30 am
- **HOISTING OF NATIONAL FLAG**
Ruzazho Village, Phek District | Time: 9:00 am
- **WALKATHON**
From Indra Gandhi Stadium, Kohima to Nagaland Civil Secretariat Plaza, Kohima
Time : 10:00 am
- **UNFURLING OF 126 NATIONAL FLAGS FOLLOWED BY BRASS AND PIPE BAND DISPLAY BY NAGALAND POLICE AND ASSAM RIFLES**
Venue : Nagaland Civil Secretariat Plaza, Kohima
Time: 11:00 am
- **PAINTING AND DRAWING COMPETITION ON NETAJI SUBHAS CHANDRA BOSE**
Venue: Capital Cultural Hall, Kohima | Time: 12:00 noon
- **CULTURAL PROGRAMME**
Venue: Capital Cultural Hall, Kohima | Time: 4:30 pm

GRAND CELEBRATIONS | 18TH JANUARY 2023

PHEK - KOHIMA

PARAKRAM DIWAS | 23RD JANUARY 2023 | PORT BLAIR, A & N ISLANDS



TIR YIMYIM YIMOBILEM (EDITORIAL)

DIMAPUR RASEMNÜ, AENJETI (JANUARY) 18, 2023

Nagaland nung elections agilanglang

- P Tiamongba Aier

Taoba hopta Nagaland assembly elections atema Chief Election Commissioner (CEC) Rajiv Kumar-i anir Election Commission of India (ECI) teshimtet telok ka anogo ananü monger meyipa ogo. Kechi komala osang ka ashitsü ta asenok ajaki ataa lia CEC Rajiv Kumar-i 'kechi südir süaka Nagaland Assembly election 2023 agitsüsa' ta sangoktsü. Paisa Nagaland nung alirtem dang election nung shilem agitsü tayongzükba agütsü. Naga nunger aikati election magidang yimten latetang ta takhangba agütsüba den ano Eastern Nagaland Peoples' Organisation (ENPO)-i state balaka meshia Eastern district 6 nungbo election magidaksütsü ta ayimokja liaka, Election Commission of India (ECI)-i election agitsüsa ta tatemtazüng o agütsüogo. Süra, election magidang yimten latettsü akhangertem aser ano state balaka meshia lungkak aiteremi kechi ashir? Asenokia kechi südir süaka akhangba ama meinyak tashi election magidaksütsü ta raratsü renema lir mali? Election magidang Naga yimten latettsü akhangertem aser ano state balaka meshirtem akangkanga longjema lir asü mesüra loksaa taoer? Asenoki khen aroka shisadangtsü nungdaker. Hao, Nagaland ya India kübok state ka lir saka asenok libaliro, sobaliba aser inyaksangshi khenyongi balaka asübayong dang Indian Constitution nunga asenok atema Arrla temeja ka enoksema lir. Süra, kodaser election agitsüsa ta ashir? Tensa meraksatsü atema election magii atatsü mesüra thinentüsü lenmang bushitep nungbo alitsü ama bilemer. Saka India sorkari parnok sünütsü asüba tera ya, Naga nunger ka pena putepa mali ta parnoki kanga junga meteta aliba ajanga lir. Anogo ishika tejakdang, ECI telok arutsü anogo nung Nagaland People's Action Committee (NPAC)-i ghonda 6 mokdangtsü ayongzükdang, saka Naga nunger kin hoho kar den nisungtemi parnok liitsü nungbo mokdang magidaksütsü ta noktakba ajanga iba sentong athitsüsa aküm. Ano, Naga yimten latettsü atema jembia aruba tiyalong nung asen Naga yimten telok ka nung lennirtem tsüngda mepetmesü adoka ano telok tasen ka tentettsüsa tia ka ajuruogo. Asen adianu Eastern Nagaland nungeri state balaka meshir saka parnok telongji kakteta reprangdangra, parnok sasep nunga meputep mesüra mepetmesü alitsü akok nung koda. Shibai metet parnok lennir karibo election nung ang shilem agidi ta noktakya alitsü akok. Ano, Nagaland state sorkari tema nungbo yimten latetra menden toktsütsü ta jembir saka parnok mulungjang nungbo election agia takok ngur ano küm pungu sorkar yimsü asütsü ang bilemya alitsü nung koda? Nagaland Chief Minister-i yashi osangbener den jembidang Naga yimten lattetsüba ya olemteperem dak dang keta lir ta shiogo. Public-ia aser MLA temia kecha mesütettsü ta pai ashir. Nagaland sorkar nung tekolakba aser Naga nunger lennirtem madak lenisangi yamaji ashir süra tanungba lennirtem aser lokti tentetem dak pa dak alia India sorkar den jembitsü mesüra raratsü tashi lir asü? Naga nunger meputep tashibo India sorkari asenok ya parnok anishilen anishitsü. Sen tera agi asen lennirtem mesüzüktsü, tashi (power) tenüng amer asen lennirtem par alar kümdaktsütsü, Naga nunger mesüzüktsü atema tiyazü tenangzükbatem maneni agitsü aser asenok yamai dang aotsü. Küna osang tajung ka angashibaji yashi Nagaland nung aliba Naga nunger külem sabang ka tentettsüba bangjemtepba lir saka ano khen meyipa reprangdangra, Naga nunger lokti tentet peria dang tenteta lir masü na? Telok tasen tentet shia Naga nunger dang mangmangdaksür aser koba telok sülen ang manidaki akümer. Anungji lokti tentet ya ojang dang tentettsüla aser mezüngbuba nung Naga kin shia pei pei sasep nung ka küma longjemtsü merangtsüla aser iba sülen jiang Naga kin ajak külemi loktepa tebong langer noktak nung dang India sorkari asen ola angashitsü aser iba jagi dang asenoki aginüba ama Naga limaji yangertettsü. Anungji tanü election masü yimten latetang ta mesüra state balaka magütsüra election mokdangtsü ta ayimtenba olaji India sorkari mangashii March 12, 2023 matongdangsa election agir 14 buba Nagaland Legislative Assembly kümtettsü.

OLEMSABANG

TANÜ PUTU NUNG KIDONG TELONGJEM TEINYAKTSÜ

(7th buba Longpok Semchir Telongjem Inti Mungdang, 12 January 2023, onük nung ajemdaker zülur)

~ Dr. M. Temjen Longkumer, Lerie Colony, Kohima

Okila:

- * Tanü putu ya kechi komala putu ka? Internet & Information Technology putu, sobaliba melenshia ainba mesüra amaba putu, research and documentation putu, Khrista dak amangba putu (Christianity: Nagaland aser alima rangben nung teimtibai amangba yimsü. India nung tasembuba yimsü). Süra iba ama putu ka nung ya kidong teinyaktsüji kechi asütsüla?
- * Missionarytem asen limai aruba aser anüolen sobaliba (western culture) ajanga temelenshi aser tajangzük aika bener arutsüogo saka asen sobaliba tajunga karbo samadaktsüogo ta bilemer.
- * Sociologist temi sobaliba (culture) ya material aser non-material culture ta lemsar jembiba angutsü. Material culture-ji asenoki amshiba aser tangshitetba osettem: Tat. agi; sobusolemtsü, Arijuki, nok-o-nü, alulem, mertsüng, bakti, molok, tsüshi khu, kodah, daki. Tanü putu nung; TV, mobile phone, washing machine, kari/car, computer, etc. Non-material culture-ji asenoki benshiba yimyakoya: Tat. agi; tamangba yimsü, kulem-kuja yimya, oshi, ochishiba, akumtsüputep, temzüng ozüng, alu mapa nung yangtepba, teburtem ariju nung ayipba.

Kidong ka teinyaktsü:

- * Sobaliba kechi tajung lir aji wazüka yuti. Kechi tamajung, tanü putu dak mapet, aji entokti. Necktie aser waist coat sobusolemba maliasü. Saka tanübo necktie aser waist coat tsüngkotepsü yimya nung yanglur asemer. Iba yagi asen sobaliba tajung wazüka ayur. Saka ak, ann, tepseta külem-küjaba, mangko bushitepba sobaliba (headhunting culture) entokogo.
- * Kidong ka indang sobusolemtsü tat. agi, tetsür teberem sü (kidong shia balala lir), tsüngkotepsü tetezü mesüra shirnoki abena aru lanurtem dang ashitsüla. Mangkotrongi atur, sü ajir, talang agutsüri dang abena aru. Tanübo ajaki abentsü akoker, business atemaa daker ayoker. Saka lanuasortemi item indang ya metettsü nungdaker.
- * Tanü putu nung pei tetsü oshi (mother tongue) ya kanga tongtibang ta bilemer. Ethnologue (oshi asadangba telok) ajanga ashiba agi alima nung 7,151 oshi jembir. Noklang shilem nung oshi 40 bo samaa odaki (40% languages endangered with fewer than 1000 speakers remaining). Ao oshi ya asen Aoer ayak lir. Ao Senden Literature Board-i Ao oshi tajungba akumtsü atema kanga meranga inyakdaki. Tetsü oshiji kibong nungi tenzüka jembitsüla aser sayutsüla. Ao oshi nung züluba otsü aser osang kakat mesüra Laishiba azüngtsü ajungshitsüla.
- * Kidong tarensen (sub-clans) indang lanurtem/chirnurtem dang ashitsüla. Kechiba süra, kibalembu asüngtetta ayutsü nungdaker. Kidong jakzüka aruba otsü aser kechiba tongtibang lanuasensortem dang ashitsüla. Aki mapang nungi kidong-o-kidong na aliba yimdak nungi aridok. Yim kar nungbo aso (generation) pungo tashi yimdaki marudaktsüba otsü lir. Ozüngji terabo sashi nungang nuburtemi benshitsü. Talisa kin aika meyoktepba aliba yimti tulu (towns/cities) nung soa intettertem aser kakatshir nem angatetdaksütsüla. Kechiba süra asen sobaliba indang teimba ka kakatshir syllabus nung inoka mali.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Catholic Association of Nagaland (CAN) mungdang tembangogo



January 15, 2023 nü Catholic Association of Nagaland (CAN) mongdang tatembangbuba anogo nung Khristantemi yimdong süa jajaba noksa nung angur.

Kohima, Aenjeti/January 17 (TYO): Anogo asemnü tashi St Joseph's College, Jakhama nung 'Khrista atema kulisür' omen nung ajemdaker Catholic Association of Nagaland (CAN) mongdang agia aruba sülen Amongnü (January 15) tembangogo.

Tasemnübuba sentong nung jembidang Kohima nung tongti putir, Rev. Dr. James Thoppil-i, iba ama mongdang ka nung adenba sülenbo asenok tamang tashi itshitsüla aser tali bendanga agütsütsüla,

ta lokti ayongzük. Omen nung ajemdaker pai, asenoki mapang shidak amshitsüla, kanga nendaka inyaktüsüla, tai atoktsüla, meimtsüla aser ochishia alitsüla; tanü telemsa adoka aliba Naga nunger loktiliba nung itemji tayongzükba ka kümogo, ta ashi.

Khrista atema kulisür tajung ka asütsü atema asenoki asen akaba tajungtiba agütsütsüla aser asen tamang atema pelaba den külemi nüma atangtsüla, ta pai ashi. Paisa lokti dang maneni

sarasademsü aser tekülem sentong nung methitemi adentsü ajungshi.

Iba sentong ya Dr Tesisovi Gerald Meyase leniba nung agi. Sentong tembangba sülen Jakhama jila tsütsüleni yimdong süa jaja aser kasa tesemi meyipa aruba sülen CAN sanen luden nung tasenpurtem tenüng sangdonga liasü.

Tatembangbuba sentongji Lotha Catholic Union Tir, James Ezung leniba nung agi aser onük jembirji Rev Dn. Dr Sherman Kuek, OFS liasü.

Yisu Baptiba tesem anasa tekülem sentong ayongzükba agi

January 17, 2023: January 13, 2023 nü Yisu Baptiba tesem anasa Yordan ayongkümlen Khristan meyrjang aika adenshia tekülem sentong agiogo; coronavirus wara tenokdangba agienba ajanga iba sentong ayongzükba agitetogo.

Iba sentong nungji kibongtem, lanurtem aser putirtem adenshia tekülem sentong agi. Baptism of Christ Catholic Arogo Tenla kidang nisung masemba agi iba sentong ya moapu nung agi.

Yerusalem nung tongti putir, Pierbattista Pizzaballa-i, "Tenla kibo tulu, ajisüaka Tenla ki telung tila asüba ajanga nisung masemer; ibayongji moapu nung agi," ta metetdaksü.

Pizzaballa-i, 'Bethany Beyond the Jordan' ta ajaba tesem (Al-Maghtas) ya kanga tongtibang; iba tesem indang Tasen Lai nung shia lir aser iba tesem ya Yohan Baptibai Yisu baptitsüba tesem dang masü saka Yisu-i pa ministry tenzükba tesem lir, ta metetdaksü.

"Yisuibo temenen memena, ajisüaka Pa-a Yohan nem baptidaksütsü atema menenpurtem den tarensena nokdaka liasü. Yisu-i nüburtim timtem nung aliba tesemtem semdang. Pai yangji ministry tenzük aser ibaji ajanga Pai meimchir meimba jungkai adok," ta pai metetdaksü.

"Asenoki ajemalutsüla aser asen taküm nung Tanela

Temeshi nem mapa inyadaksütsüla. Tanela nung taküm tetezü temeim, taremsük, taitok aser akhümtsübuba lir. Nai tai metoktetra ajak teraksa. Tanelai longjemdaksür saka shi-ibo telemsa adokdaksür," ta Pizzaballa-i ashi.

Küm 25 tejaklen Jordan linüki Israel den yimjung tezüngzüktep agiba sülen anüdoklen Yordan ayongküm nung ali tua bushisüngdangba maparen tenzükba liasü aser iba mapang nungji baptiba tesem ngutet.

2030 küm Khristantemi Yisu Baptiba sülen küm 2,000 ajungba amongtsü aser iba benjungmong atema iba tesem nungji senjenti indoka renemdar.

Taoba ita Jordan-i shilem trok lemsar inyaktüsü atema dollar sen million 300 project tenzükogogo. Küm shia raliwalir million 1 dak tema nem Yisu baptiba tesem semdangdaksütsü nükjidong nung iba area nung Laishiba nung shia aliba yim nung terenlok mapa inyaker.

Iba tesem nungji kiojen yangluba den tanga service balala agütsüba ajanga temeshi aini aoer raliwalir Khristantem jangratema mongtettsü aser tanela nung temoatsü angutsü.

Biblical tourism village project ya Jordan linüki yimsü dak sendakba tourism sector ajungketsütsü atema inyakba shilem rongnung ka lir. Laishiba

nung shia aliba tanga tesemtemji Mosa-i tenangzükba lima anguba Nebo tenem, Yerusalem densema Mosa mapang map aser Beyond the Jordan nung Elijah tenem densema lir.

Coronavirus wara sülenbo tang mezüng Yisu baptiba tesem nung tekülem sentong agir.

Jordan nung Catholic Center for Studies & Media Director, Rifat Bader-i, "Temeshi aini aoertem atema taküm küm ya kanga tongtibang asütsü. Jordan linüki official süa iba tesem nung terenlok mapa inyaktüsü sangdongba sülen ita ana lir iba sentong agir," ta metetdaksü.

Paisa, iba project atema aser Tenla ki renemtsü atema senotsü nungdaksü, ta ashi.

Küm 23 tejaklen St. John Paul II-i iba tesem semdanga liasü aser 2009 küm May ita nung Pope Benedict XVI-ia UNESCO World Heritage Site ya semdangogogo. Iba tesem ya Jordan yimtiba, Amman nungi mile 30 shi pilar lir.

Pope Benedict den Jordan Chuba Abdullah II aser Chubatsür Rania nungeri Catholic Church of the Baptism of Christ Tenla ki yanglutsü atema lung azüngja liasü. Iba sülen küm pongu lir Pope Francis-ia iba tesem semdanga sarasademba den külemi Jordan linük nung jenoka aliba Iraq aser Syria nunger refugees ajurua liasü.

ANOGO ABEN TSÜNGREM DEN

Küm tasen kishi lapoka lir

"Mapa tulu inyaktetsü asoshi kishi lapoka lir, aser arur aika lir" (1Kor. 16:9)

Asen taküm nung kishi aika lapokja lir, mapa tulu inyaktetsüba kishi, nungdak aika nung amshitettsü tashi aser tanelaren nungdak bushitetba tulu. Aikati asen meketa aliba taji dang repringer ibaji mapa tulu inyaktetsüba tenokdangba tulu ama bilemer; saka shidakba tangatetba nung tenokdangbaji mapa tulu inyaktüsü mapang tajungji lir. Asenok tanelaren tangatetba nung tashidak keta aliba ajanga taji tenokdangba jara ka ama repringer.

Saka arur melii kishi lapokbaji mali. "Mapa tulu inyaktüsü kü nem kishi tulu lapokja lir, aser idakji tsükchir aika lir." Mapang tajung shia nungji timtema lir, aser timtem shia nungji mapang tajung lir. Ibayongji temoatsü aika magiteter, temaba jenjangi atutsü aika masadangi toktsür, tenzükba wadang tapu aika mezülui toktsür. Missionarytemi pei tajaba wadangi moi toktsür! Parnoki tajabaji angashir, ajungshibaji parnoki metetter, parnoki aotsü janrar, parnoki kishi lapoka alibaji angur aser ora alitsüba; saka idakji tsükchirtem lir, tenokdangtsütem lir, tasüaittsü ajungshiba mali; idakji tarendaksü adoker; mangdangji azülaa akümer, tajaba tulu matalokdaksür.

Yangi asenoki küm tasen nung kishi lapoktsüba shisadangdi. Tejenba kümji tatembangba anogo shibangogo. Asenoki menungra bilemaka aji tanaben meyipa arutsü makok. Saka Tsüngrem tauchi agi asenok nem tasenba küm kishi lapokja kar. Ibai Tsüngremi agütsüba mapang tajung ta aikati meblem süidaksür. Tsüngremi mulungba nung anogotemi mesüidaksür. Iba lima Tsüngremi parnok tenük pokdaksür. Asenoki parnok amaji melili. Küm tasenji asenok nem "kishi tulu" lapoktsüba ama asenoki agizükdi!

Mezüngbuba aser tongtipangtibaji ibai Tsüngrem den telungjem takaba akümtsü kishi lapoktsüba lir ta agizükdi. Mamangertem asoshi Tsüngrem den telungjem akabaji tepuatsü mali. Saka Khrista nung alirtem asoshi yimya tasen, tanela nung tzüraba aser tepela adokdaksür. Temerüktiba tepelaji Tsüngrem den telungjem akabaji lir. Küm tasen tenzükdang asen Kotaker Tebui asenok ajak Pa den telungjem nung alitsü ajar.

Ano küm tasenji Khrista asoshi nungdak tuluba nung amshitsü kishi lapoktsüba lir. Tatem nung kodang ayong ajangdir, asenoki asen mapang tajung tangar Khrista dangi anir aruba nung amshio go ta menungra meyipa repringtsü. Tatem anogo nung Kibubai "Lan lia kilir tajung, junga inyakogoo" ta ashitsü asenok nem küm ka sülen küm ka moatsüdang asen nem agütsüba mapang tajungji ajangzükba amshitsü merangdi. Tamajung bilema aliri mapang tajung ajak nung timtem angur aser shirnoki tajung bilemer, parnoki timtem ajak nung mapang tajung angur. Iba küm ya timtem anguba küm masü, mapang tajung anguba küm südakjang. Angutsü asoshi asenok tenük lira, idakji ajaklen kishitem lapoka lir.

Myanmar nung sepaitemi küm 129 tain Tenla ki ka rongdoktsüogoo



Myanmar nung sepaitemi Sagaing region nung Assumption Arogo Tenla ki rongdoktsür aliba noksa nung angur.

January 17, 2023: Myanmar sepaitemi Tenla kidangji sepaitemi ano Khristan yimtsüng mejangba sülen tasüngnü ka nung küm 100 dak tema Tenla (January 15) sepaitemi Tenla kiji ki ka rongdoktsüogoo, ta Khristan rongdoktsü.

Iba yimdakji ki 500 dak tema rongdoktsü. Tesüiba ita 8 tsüngda sepaitemi tang agi pezübenbuba iba yim maakogoo.

Myanmar nung nütsüng million 55 lir saka Khristan nütsüngbo shilem 8.2 shi dang lir. Yaküm May ita nungi tenzükba sepaitemi mapang shia Chan Thar mita arur.

Yaküm May 7 nü mezüng sepaitemi iba yim amakba mapang nung ki 20 rongdoktsüba den külemi sowar ka densema Khristan ana tepseta liasü. June 7 nüa sepaitemi ki 100 dak tema rongdoktsü aser December 14 nü ki 300 dak tema rongdokja liasü.

Yaküm May ita nungi tenzükba iba yim nungi nisung meyrjang aika jenshia Mandalay yimti nung aliba Tenla ki balala nung jenoka lir.

January 14, 2023 nikonngang sepaitem yim tonga aruba sülen ki aika rongdoktsü. Aonung

AO OSHI ANGAZÜKDAK: TANÜ ANGAZÜKTSÜBA OJANG

Onü (n) obala teyi tenu dang ajaba (address to paternal aunt) * Asenoki pei tebu teyi tenu ajak dang onü ta ajatsüla. Onnü (n) tazü achiba tanüla süngolemba tapu ka (Spinach type slippery leafy vegetable) * Temang atema onnü ya chiyongtsü tajung ka lir.

OLONG PAITEP # 6402

Grid for Olong Paitep # 6402 with numbers 1-16 in various cells.

TIPIEN

- 1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüc asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 6401 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Mitsüksü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.



SOBANGBA O ALOKBA NA :

Sobangba : Tamba, ni Joko tetsür ka den dang küm terpungo meimtepeter aja. Alokba : Oh great, nai nü kinungtsü yamaji meimbaji Kanga tajung ato. Sobangba : Masü masü, ni meimlajibo tangar ka aja. Temba, please agi ozü tantsü dang teshima no, ana küla akok tokzükteperji to. Alokba : Haeet temba, asenok ya yimtsü-yimbu ta aikati züngshirji Joko asenok ajak asüngteta alitsüla akoti!

- Lilir : WhatsApp



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Champhai nung tetsür 2 ket nung Rs 1.31 crore alang heroin apu



Champhai nung Rs 1.31 crore alang heroin apuba noksa nung angur.

Aizawl, January 17, 2023 (Agencies): Mizoram kübok Myanmar arrtsü anasa Champhai district nung Rs 1.31 crore alang heroin apu. Heroin gram 263.4 shi apubaji international market nung Rs 1.31 crore shi alang lir ta asadangtetogo. Assam Rifles sepaitem aser Mizoram excise and narcotics

department külem telok kati heroin ji apu. Champhai district nung Assam Rifles aser Mizoram excise and narcotics department ketdangsürtemi heroin gram 263.4 apu, ta Assam Rifles sangdong ka nung metetdaksü. Iba dak sendakba nung tetsür ana pua lir. Tena ya Lalthuanpui aser Lalbiakthangi na ta

jangjaogo aser tena ya Champhai district nungi lir, ta parnokisa ashi. Champhai-Zokhawthar road nung Mualkawi tesem nung heroin ji sapon pongdang 21 nung miima enoker lia apu. Parnoki apuba heroin ji Myanmar nungi bener aruba asütsü ta Assam Rifles ketdangsür kati ashi.

Manipur police ket heroin & WY süngjang aika apu

Imphal, January 17, 2023 (Agencies): Manipur police-i police commando telok ka ket nungi heroin aser WY tablets aika puogo. Parnok ket nung Rs 80,000 bena aliba apu. Manipur nung national highway 102 (Imphal-Moreh road) nung police commandos ket nung mozü den senji apu. Mozü shibelenba maparen nung police pungu pua lir, ta Kakching district Superintendent of Police Shrey Vats-i ashi.

Manipur police gari nung sapon pongdang 100 nung heroin aser WY tablets indang bundle 8 bena liasü. WY ji 10,000 tablets shi liasü, ta SP Vats-i ashi. Arrtsü adena orr alir nungi osang tejangja ka angazükba sülen Kakching police-i Moreh nungi aruba gari ka mita reprangdang mozütemji apu. Iba mapa nung shilem agir Manipur police temji Kh Achouba Singh, attached to CDO Unit, Kakching (team

commander); Th Subhash Chothe, presently attached with CDO, Unit, Kakching; Y Dineshwar Meitei, presently attached with CDO Unit, Kakching; M Premchandra Singh, attached with CDO Unit, Kakching aser N Dorendrajit Singh, attached with CDO Unit, Kakching nunger lir. Parnoki bena aliba Heroin ji seret 1.336 aser WY tablets ji seret 9.151 liasü.

Meghalaya nung mezüngbuba Govt engineering college lapok



Shillong, January 17, 2023 (Agencies): Meghalaya nung mezüngbuba government engineering college Shillong nung lapokogo. Chief minister Conrad Sangma-i Hombarnü Shillong Government Engineering College, Meghalaya lapokja liasü. "Iba college ya NPP-i aniba Meghalaya sorkar mapang lapoktsür aser mezüng atema sorkar ka akümer" ta Conrad-i ashi. Sorkari tesüiba küm pungu tashi lanurtem dak temulung agüja inyaka arur, ta paisa ashi. "Ozü sorkari wadang balala nung lanurtem asoshi inyaksür aser iba ajanga tarutsü nung Meghalaya renlokba nung

yaritsü" ta CM Conrad-isa ashi. Iba mapatong ya Rashtriya Uchcharat Shiksha Abhiyan (RUSA) ajanga inyak aser Rs 26 crore endok. Iba College ya Shillong Polytechnic (16.11 acres) kübok ali acre 7.8 nung yanglu. Shillong government engineering college nung civil engineering, electrical engineering aser mining engineering course tem agitsü aser course shia kaketsür 30 azüngtsü. State sorkari lanur 90,000 tema dang asüngdangtepogo aser iba ajanga parnok asoshi road map ka adokogo, ta Meghalaya CM-isa ashi. State sorkari entrepreneurship, sports aser music tsütsü sentong balala

tenzükgogo ta paisa shisem. "Lanurtem ya rongsen aser tashi lir aser asenoki parnok tim lenmang nung anitettsüla. Linük nung Meghalaya ya state tajungtiba kümdaktsütettsü aser lanurtemi asen state tarutsü len anitsü" ta Conrad-isa metetdaksü. Meghalaya chief minister-isa education wadang tajungba akümstü aser tanur indang health & mental well-being sendaktepba indang tebilemba lemsatop. Meghalaya sorkari mezüngbuba state university Captain Williamson Sangma State University lapoktsüogogo aser iba ya Tura anasa Balalgre nung lapokogo, ta Conrad Sangma-isa ashi.

Nepal: Tayimtsü tsükokba sülen samara alirtem maneni bushidar



Kathmandu, January 17: January 17 nù Pokhara, Nepal nung Yeti Airlines tsükokba lendong nung asürtem tasü mang staff temi tata gari ka nung inokba noksa nung angur. Item tasü mangtem ya Nepal yimtiba Kathmandu-i bener aotsü.

Kathmandu, Aenjeti/January 17 (Agencies): Nepal nung tayimtsü ka tsükokba nung passenger ana samara tang tashi monguteti aliba bushitsü atema teküzmükertemi drone tem yokogo. Nepal nung küm 30 tsü ngda tayimtsü tokba lendong rongnung Deobarnü tayimtsü tsükokba ya tamajungtiba liasü, kong nisung 70 süogo.

Teküzmükerti kari longren meter 200 shi sua lua samara aliba passenger bushia liasü. Ketdangsurtemi ashiba agi nisung ana ya taküm angutsübo kecha timla mali.

"Iba tesem nung tziüsü kanga melema longdar. Onoki teküzmükertem süngzü agi sendaker longreni yokdar, kong tayimtsü shilem ka tsüka liasü," ta Pokhara nung police ketdangsur Ajay KC-i Reuters news agency dang Mongolbarnü ashi.

Pokhara yimti anasa longrenlongpang ajanga teküzmükba maparen inyaktüsü atema tetsükdaktsü adokdaktsüba den tsüngsang majungba ajanga teküzmükertem nem tetsükdaktsü tulu agütsür, kong Yeti Airlines indang ATR 72 turboprop tayimtsü ka nung nisung 72 mener Deobarnü tsükoka liasü.

Teküzmükertemi Hombarnü tasü mang ana ngutetogo, saka tetsangwa peria melei akümba

ajanga inyakyim sota liasü.

"Passenger tem rongnung tanur tila densema liasü. Karbo mi agi ronger asü asütsü aser tasü mang mangutsü akok. Onoki maneni bushitsü," ta Ajay-isa ashi.

Television channel temi tayimtsü tsükokba lendong nung asür kinunertem Pokhara hospital kima jeptepa tasü mang atatepba sayuogo.

Mozüki nung staff temi Mongolbarnü nungi asür kinungertem nem tasü mang agütsü tenzükogo.

Pokhara hospital nungi army indang tata gari nung tasü mang 10 airport-i benerogo, koba linük yimtiba Kathmandu-i tayimtsü ajanga bener aotsü, ta AFP news agency-i ashi.

Press Trust of India news agency sangdong ka ajanga ashiba agi, tayimtsü pilot Anju Khatiwada ya la kinungbo 2006 küm passenger tayimtsü tilaka aniba mapang tsükoka asüba sülen Nepal indang aviation sector nung zü ngoksema liasü.

H o m b a r n ü bushisü ngdangertemi cockpit voice recorder aser flight data recorder meraksai lia ngutetogo. Iba ajanga tayimtsü tsükokba kuli jangjatsü asoshi bushisü ngdangertem nem teyari agütsütsü.

International aviation temzü ng ozü ng kübok tayimtsü aser engine design asüba aser yangluba linük indang crash

investigation agency tem bushisü ngdang nung adener.

ATR ya France nung amenoka lir aser tayimtsü indang engine ya Canada nung Pratt & Whitney Canada-i yangluba lir. France aser Canada nungi

bushisü ngdangertemi ashiba agi, bushisü ngdang nung parnokia shilem agitsü sentong lir.

Nepal nung tawa aviation industry kanga kara renlokyonga odar. Tayimtsütem yagi oset aser nisungtem kinük nung aliba tesemtemi anir aoer aser iba den bendanger tenemi aturtema anir senzür.

Ajisüaka training aser maintenance agi anü ngba ajanga aiben timtem lendong ajangshia arudar. European Union-ibo Nepal indang tayimtsütem parnok indang anü ng nung ayimtsü temelaba magütsür.

Kasa mapang nung Nepal nung alima nung tayimtsü anentsü asoshi kanga asakba runway tem yanglua lir. Item runway tem ya tenem agi meketbanger lir aser iba den tsüngsang mopung mashi mapang nung melenshiba ajanga tetsükdaktsü aika adoker.

Nepal nung 1992 küm tayimtsü tsükokba lendong tuluba ataloka liasü. Iba lendong nung Pakistan International Airlines jet ka nung mener alir nisung 167 prongla asü. Tayimtsü ya Kathmandu-i oya aliba mapang tsükoka liasü.

OFFICE OF THE KOHIMA KHARLAR TELONGJEM KOHIMA TENÜNGSANG AGÜTSÜR

KKT-i Kharlar Watsü tajung aser lenir, tawa Govt. of Nagaland Public Service nung temaba jenjangi ajungketba tenüngsang aser tetushi agütsür.

1. Dr. Temjentsungla, Principal Director, Health & Family Welfare Deptt. jenjang angu.
2. Wt. Imcharenla IPS, Inspector General of Police, DGP Deptt. jenjang angu.

Nenok taküm aser wadang talidang mojangma.

Sd/- (TEMSUKUMLA WALLING) President Sd/- (NOKSANGTEMLA) Secretary

Pakistan EC ozü ng yanglur 271 suspend sütsü Islamabad, Aenjeti/January

election achaayangba telok rongnung tongtibangi, assets aser liability statement magütsüba atema linük kübok ozü ng yanglur 271 suspend sütsüogo.

Iba statement ya küm shia December 31 nü tashi nungbo benoktsü nü ngdaker aser ozü ng yanglurtem dang Election Commission of Pakistan (ECP) June 30, 2022 tashi nung parnok indang financial statement January 16, 2023 tashi nungbo benoktsü atema tetuyuba agüja liasü. EC-isa, financial statement mebenokra parnok suspend sütsütsü ta tekümdangtsü metetdaktsüogo.

ECP-i Hombarnü ashiba agi, ozü ng yanglurtem rongnung National Assembly zü ngsem 136, senator 21 aser Provincial Assembly balala zü ngsem 114 densema lir.

Taoba kü mbo National Assembly (MNAs) zü ngsem 35 aser senator aseme dang atakzü ktsür aliba anogo tashi nung parnok indang statement mebenoki liasü. Taküm National Assembly nung Pakistan Tehreek-e-Insaf (PTI) zü ngsemtemi parnok mapa toktsüba atema statement mebenoker aika kü mogo, ta Dawn osang kakat

sangdong ka ajanga Mongolbarnü metetdaktsü.

ECP-i sangdongba list nung suspend sütsüba zü ngsemtem rongnung Punjab nungi Provincial Assembly zü ngsem ka danga densema maliasü, kechiyong provincial assembly ya loksatokogo.

MNA aser senator tem dak alia Sindh nung MPA 48, Khyber Pakhtunkhwa nungi 54 aser Balochistan nungi 12 ta suspend sütsüogo.

Suspend sütsüba MNA tem rongnung Pakistan Muslim League-Nawaz (PML-N) lenir tejen aser cabinet zü ngsem Ahsan Iqbal aser Khawaja Asif na aser Public Accounts Committee mendenbuba Noor Alam Khan nunger densema lir.

List nung zü ngoksema aliba tanga federal minister tem rongnung Sajid Turi, Mufti Abdul Shakoor, Chaudhry Tariq Bashir Cheema, aser Mohammad Israr Tareen nunger densema lir.

Muttahida Qaumi Movement-Pakistan (MQM-P) Convener Khalid Maqbool Siddiqui-a iba list nung zü ngoksema lir.

Suspend sütsüba senator tem rongnung taoba finance minister aser PTI senator Shaukat Tarin dena lir.

Somali: Al-Shabab puri sepai tenet tepset

Mogadishu, Aenjeti/January 17 (Agencies): Al-Shabab zü ngsemtemi central Somalia nung military base ka amakba sülen base commander densema sepai tenet tepsetogo, ta ketdangsur kati metetdaktsü.

Al-Qaeda den sendaktepa aliba telungpurtem yagi Mongolbarnü Hawadley yimtsü ng nung amenoker aliba base ya gari nung bomb inoka bener amak aser iba sülen injang khalokja liasü, ta Captain Aden Nur-i Reuters news agency dang ashi.

"Commander densema sepai tenet al-Shabab telungpurtemi tepsetogo," ta Nur-i ashi.

Iba base amakba ya al-Shabab puri nangzükogo aser

ashiba agi, parnoki commander densema sepai aika tepsetogo.

Iba base ya linük yimtiba Mogadishu nungi km 60 shi pilar lir aser iba tesem ya sorkar sepaitemi parnok den longjemer aliba teloktem den senteper taoba kü m October ita atsü nga liasü.

Hombarnü sorkari Indian Ocean tziüküm nung al-Shabab pur küm aika amenoka aliba Harardhere tesem atsü ngogo ta sangdonga liasü.

Sepaitemi al-Shabab pur kanga nongshiba mapang parnokia meyipre telangzüba agüja arudar. Parnoki prangbong aser bomb amshia military aser civilian tem maka arudar, kong parnoki toktsür

aoba tesemtem densema lir.

Iba telok ya 2007 küm nungi Somalia central sorkar atsü ngtoka Islamic ozü ng tesashi benoktsü atema rara arudar.

Tesem kar nungbo al-Shabab puri kitem rongtoktsür, tziübo raksatsür aser civilian tepsetba den saru dena akhanger, iba ajanga nüburtemi sorkar den külemi raratsü atema paramilitary teloktem tenteta arudar.

Iba mepetmesü adoker aliba ajanga Somalia nung chiyongtsü agi kanga anü nga kü mogo aser Somalia nunger 200,000 dak tema chiyongtsü agi anü nger aser tesem kar nungbo ayawara agi meneptsü ana nung lir.



Tesayurtem, tanga public worker aser pensioner temi itasen aser pension sen ajungkettsütsü aser parnok tangutsü tim tajangzüktem ajak agütsütsü khanga Caracas, Venezuela nung longkak aiba mapang tangokba noksa nung angur. Venezuela nungertemi oset nung jenjang tali akümba aser mapa balala atema taa kanga ajema agütsüba atema longkak aita arudar. Parnoki ashiba agi, itasen aparaba agi US dollar dak ajemdaker yanglua aliba chiyongtsü jenjang matur. Ita nung minimum wage ji \$7 shi lir.

Nagaland Junior Girls basketball team Bangalore nung asayatsü



Dimapur, Aenjeti/January 17 (TYO): 72buba Junior National Basketball Championship nung shilem agitsü atema Nagaland Junior Girls basketball team January 16 aonung apusoa ogo.

Iba asayamung ya Sree Kranteerava Stadium, Kasturba Road, Bangalore nung January 21 nungi tashi asayatsü.

Iba asayamung ya Basketball Federation of India tawabangka kübok Karnataka State Basketball Association-i ayongzüka asayatsü.

Taoba küm Meghalaya yimtiba Shillong nung National Zonals asayaba mapang Nagaland Junior Girls basketball team tasembuba jenjang nung tembanga iba asayamung atema qualify süa liasü. Team ya captain Ruokuosanuo Sachu aser Vice Captain Neikeduonuo Sachu na lenisüba nung asayatsü.

Nagaland Junior Girls basketball team nungi asayartem:

Ruokuosanuo Sachü (C)

Neikeduonuo Sachü (VC)
K. Deborah Newmai
Rokovino Pucho
Medosevino Nagi
Keneingunuo Keditsu
Rupa Gurung
Maria Goretti Beck
Phibalari Kharmaw
Skani Sumer
Ibajanai Rani
Maryliana Jyrwa

Coach: Kevilhoubi Khezhie
Asst. Coach: Temsu Longkumer
Manager: Seyievinuo Nguzhu.

Australian Open nung Russia aser Belarus wako amshitsü memelar

Melbourne, Aenjeti/January 17 (Agencies): Tennis Australia-i Mongolbarnü Australian Open nung Russia aser Belarus wako mamshitsü atema tenokdangba agütsüogo. Asaya nung wako amshiba anguba sülen Ukraine indang ambassador-i iba anema jenjang tapet agitsü akhang aser tang tenokdangba agütsüogo.

Russia indang wako ya Hombarnü Ukraine tsür Kateryna Baindl aser Russia tsür Kamilla Rakhimova na mezüngbuba anogo mezüngbuba round asayaba mapang amshiba nguogo. Iba sülen Ukraine nung fan temi police ja liasü.

Kasa mapang nung Daniil Medvedev aser America nung asayar Marcos Giron na asayaba mapang Rod Laver Arena nung Russia indang wako ka sala liasü.

"Australia Open asayaba mapang Russia aser Belarus na indang wako amshitsü memelar," ta Tennis Australia-i ashi.

"Mezüngbo onoki fan tem nem wako bener arutettsü saka lokti minprongtsüsa

mamshitsü asoshi tenokdangba agütsür liasü. Yashi asaya mapang courtside nung wako ya yua liasü.

"Iba tenokdangba ya tetuyuba agütsüba mapang nungi benoka inyaksangshitsü. Tennis asaya jangradema reprangtsü asoshi onoki maneni asayar ser fan tem den angatettepa inyaktsü," ta kasa sangdong ajanga metetdaksü.

Ukraine amak tenzüka sülen Russia aser Belarus nung asayartem jurila asayar ama neutral wako ka kübok asaya aruogo aser kasaji Australia Open nunga asayadar.

Australia aser New Zealand dangi Ukraine ambassador Vasyl Myroshnychenko-i, Hombarnung Tennis Australia dangi iba anema jenjang tapet agitsü shia liasü.

"Australia Open nung Ukraine nungi tennis asayar Kateryna Baindl asayaba mapang yimjak nung Russia wako sayaba ya ni aitsür," ta pai tweet asü.

"Ni Tennis Australia dang 'neutral flag' policy" tangsa tang benoka inyaksangshitsü

akhanger," ta paisa ashi.

Myroshnychenko-i taoba hopta Australia Open achaayangertem dang Russia aser Belarus nung asayartem iba asayamung nung shilem magidaktsütsü atema mepeshia liasü.

Taoba küm Wimbledon nungbo linük ana nungi asayartem shilem magidaktsü aser ibayongji ATP aser WTA-i iba asayamung atema ranking points magütsü liasü.

Taoba mapang Ukraine dangi Australia ambassador Doug Trappett-i iba tatalokba dak sendakba nung Australia Open ayongertem aitsüogo.

"@AustralianOpen nung taktsü mapa.. iba ya mezüngbuba anogo dang," ta pai tweet asü.

Baindl aser Kamilla na asaya ya Baindl-i -5, 6-7, (8/10), 6-1 agi kokogo aser la tanabuba round nung America tsür Caty McNally den asayatsü.

Ukrainian-Australian fan Maria Tumarkin-i Melbourne Age newspaper dang ashiba agi, Russia nung fan temi Baindl minprongba agi lai security jaoka liasü.

India vs New Zealand: Shreyas Iyer yirur masayatetsüsa kümogo

Aenjeti/January 17, 2023 (Agencies): Shreyas Iyer teberem yiruba ajanga New Zealand den ODI asaya asem asayatsü aliba nung shilem magitetsüsa kümogo, ta BCCI-i sangdong ka ajanga metetdaksü.

Shreyas Iyer melena middle-order batsman Rajat Patidar team nung züngoksemogo.

"India team nungi batter Shreyas Iyer teberem yiruba ajanga New Zealand den ODI asem asayatsü aliba nung shilem magitetsü. Pa temang anepalutsü atema National Cricket Academy (NCA)-i aotsü. All-India Senior Selection Committee-i Shreyas Iyer melena iba asayamung asoshi Rajat Patidar shimogo," ta BCCI sangdong ajanga metetdaksü.

Rajat Patidar-i tang asaya aliba Ranji Trophy nung Madhya Pradesh team nungi kanga junga asayaogo. Right-handed batter yagi asaya pongu (innings ti) nung run 438 yanglu, kong century ka aser half century asem densema lir.

2022 küm Shreyas Iyer ya India nung batter tem rongnungi ODI nung kanga junga shilem agiba asayar ka

liasü, saka taküm Sri Lanka den ODI asem asayaba mapang junga masayatet. Pai asaya asem nung run 28, 28 aser 38 yanglua liasü. Iyer teberem yiruba ajanga iba asayamung nung masayatetsüsa kümra team nung jenjang yanglutsü asoshi Suryakumar Yadav nem asaya asem tashi maongka agütsütsü. Middle order nung Surya aser Hardik Pandya nati iba asayamung nung tongtibang shilem agitsü imlar.

Kasa mapang nung KL Rahul-a pa jurila maparen kar aliba ajanga iba asayamung nung shilem magitetsü aser iba ajanga wicketkeeper-batsman Ishan Kishan nem lenmang lapoktsüogo.

India aser New Zealand na mezüngbuba ODI asaya Hyderabad nung January 18 nü asayatsü.

New Zealand den asayatsü atema India ODI squad: Rohit Sharma (Captain), Shubman Gill, Ishan Kishan (wk), Virat Kohli, Suryakumar Yadav, KS Bharat (wk), Hardik Pandya (vice-captain), Rajat Patidar, Washington Sundar, Shahbaz Ahmed, Shardul Thakur, Yuzvendra Chahal, Kuldeep Yadav, Mohd. Shami, Mohd. Siraj, Umran Malik.

India Open 2023: Lakshya Sen tanabuba round-i iogo

New Delhi, Aenjeti/January 17 (Agencies): Defending champion Lakshya Sen-i Mongolbarnü Yonex-Sunrise India Open Super 750 badminton asayamung tebur kija asaya mezüngbuba round nung külem India nung asayar HS Prannoy koka tanabuba round-i iogo.

IG stadium nung KD Jadhav Indoor hall nung asayaba asaya nung world No. 12 Sen shiba iba asayamung nung seed tenetbuba asayar lir, pa world No. 9 asayar Prannoy dang nungi kanga agi tajungba liasü aser pai asaya 21-14, 21-15 agi straight set nung koka liasü.

Kasa mapang nung Commonwealth Games bronze medallist Treasa Jolly aser Gayatri Gopichand natia tetsür tarep asaya mezüngbuba round asaya 22-20, 17-21, 21-18 agi France tsür world No. 29 tarep Margot Lambert aser Anne Tran na kokogo.

India nung rongnungi N Sikki Reddy aser tarep asaya nung la indang partner tasenba Shruti Mishra na 17-21, 19-21 agi Germany tsür Linda Efler

aser Isabel Lohau nati tsükdakja liasü.

Mongolbarnü Denmark nung asayar Rasmus Gemke-i world championship anaben tashi koker aliba Japan nung asayar Kento Momota 21-15, 21-11 agi kokogo aser China nung asayar Shi Yuqi-i kanga meranga asayar Indonesia nung asayar Chico Aura Dwi Wardoyo 20-22, 21-16, 21-15 agi kokogo. Maneni Chinese Taipei nung asayar Wang Tzu Wei-i Ireland nung asayar Nhat Nguyen 21-18, 21-17 agi koka liasü.

Chinese Taipei nungi seed pongububa asayar Chou Tien Chen-i 22-20, 14-21, 21-11 agi Lee Cheuk Yiu akok aser tanga asaya ka nung Zhao Jun Peng-i 21-19, 21-12 agi Weng Hong Yang madak takok ngua liasü.

Tetsür kija asaya nung Ratchanok Intanon, shiba yiruba ajanga masayai lir tang asaya tenzükgogo, lai Malaysia tsür Goh Jin Wei 21-13, 21-11 agi akok aser Rio Olympic champion Carolina Marin-i 2017 world champion Nozomi Okuhara 21-13, 21-18 agi koka liasü.

BILEMDANGANG

"Tamajunger nem na manisadaktsütsüsa kümdanga liang."